

ekki lokið kandidatsprófi í læknisfræði með I. einkunn, en hins vegar skrifað doktorsritgerð eða aðra ritgerð um efni, er varðar sérgrein hans og byggð er að verulegu leyti á eigin athugunum og rannsóknum, og getur hann þá átt rétt á sérfræðingaleyfinu eða viðurkenningunni, ef læknadeild háskólans metur ritgerðina gilda.

#### 5. gr.

Það skal metin gild sönnun fyrir sérmenntun læknis samkv. 2. og 3. gr., ef hann hefir verið fastráðinn aðstoðarlæknir tilskilinn tíma við tilskilið sjúkrahús eða sjúkrahúsadeildir. Það skal og metin gild sönnun fyrir sérmenntun læknis, ef hann hefir verið aukalæknir tilskilinn tíma við sjúkrahús eða sjúkrahúsadeildir, sem ráðherra hefir samið við um sérmenntun lækna, enda hafi hann þaðan góðan vitnisburð.

Af þeim, sem aflað hefir sér sérmenntunar á annan hátt en segir í fyrri málsgrein þessarar greinar, skal þess krafizt, að hann bendi á yfirlækni eða yfirlækna við tilskilin sjúkrahús eða sjúkrahúsadeildir, er vilji gefa ráðherra trúnaðarumsögn um hann, enda hafi hann starfað sem læknir tilskilinn tíma við þau sjúkrahús eða sjúkrahúsadeildir. Snýr landlæknir sér þá til viðkomandi yfirlæknis eða yfirlækna, og skal gildi sérmenntunarinnar metið samkvæmt þannig fenginni umsögn eða umsögnum.

Að svo miklu leyti, sem ekki er tilskilið um sérmenntun lækna samkvæmt 3. gr. að þeir afli sér hennar við störf á sjúkrahúsum, skal krafizt gilda vottorða frá viðurkenndum sérfræðingum um sérnámið, og má krefjast trúnaðarumsagna samkvæmt 2. málsgr. þessarar greinar, ef ástæða þykir til.

Reglugerð þessi öðlast þegar gildi og fellur þá jafnframt úr gildi reglugerð nr. 116, 30. desember 1932, um skilyrði fyrir veitingu lækningaleyfis og sérfræðingaleyfis samkvæmt lögum nr. 47, 23. júní 1932.

*Dóms- og kirkjumálaráðuneytið, 20. febrúar 1936.*

**Haraldur Guðmundsson.**

*Friðg. Bjarnarson.*

**Staðfesting konungs** á skipulagsskrá fyrir „Hvammstangasjóð“, útgefin 6. marz 1936 á venjulegan hátt að mandatum af dóms- og kirkjumálaráðherra.

Skipulagsskráin er þannig:

## SKIPULAGSSKRÁ fyrir „Hvammstangasjóð“.

#### 1. gr.

Sjóðurinn heitir „Hvammstangasjóður“. Hann er stofnaður af eignum þeim, er „Málfunda- og Ungmennafélagið á Hvammstanga“, er starfaði þar á árunum

16 1907 til 1910, lét eftir sig, er það hætti störfum og uppleystist. Upphæð þessi var  
6. marz þann 1. jan. 1934 kr. 1713.09, og er það stofnfé sjóðsins.

2. gr.

Sjóðurinn skal geymast og ávaxtast í Sparisjóði Vestur-Húnavatnssýslu á Hvammstanga eða í ríkiskuldabréfum.

3. gr.

Höfuðstól sjóðsins má aldrei skerða. Allir vextir skulu leggjast við höfuðstólinn, unz hann er orðinn kr. 2500,00 — tvö þúsund og fimm hundruð krónur —, en þegar sjóðurinn hefir náð þeirri upphæð, skal leggja hálfa ársvexti við höfuðstólinn, en hálfum ársvöxtum má verja til þess að styrkja einn eða fleiri efni-lega unglinga, er hafi náð 14—20 ára aldri og eigi heima á Hvammstanga, til náms við einhverja verklega menntastofnun.

Ef ekki er hægt að nota vextina eitthvert ár á þennan hátt, skulu þeir allir leggjast við höfuðstólinn.

4. gr.

Hreppsnefnd Kirkjuhvammshrepps, og ef Kirkjuhvammshreppi verður síðar skipt þannig, að Hvammstangi verði sérstakur hreppur, þá hreppsnefnd Hvammstangahrepps, skal hafa á hendi alla umsjón sjóðsins og stjórn hans. Hún skal auglýsa, hvenær styrkur verður veittur úr sjóðnum. Hún tekur við umsóknum um styrk og ákveður, hver eða hverjir skuli hljóta hann, og hvenær styrkurinn skuli útborgaður.

5. gr.

Stjórn sjóðsins ber að halda gerðabók fyrir sjóðinn og færa í hana skipulagsskrána, fundarsamþykktir um sjóðinn, styrkveitingar og annað, sem snertir sjóðinn. Stjórnin haldi enn fremur bók yfir eignir sjóðsins, tekjur hans og gjöld og færi í hana ársreikning sjóðsins.

6. gr.

Enginn umsækjandi getur fengið styrk úr sjóði þessum, nema hann neyti ekki áfengis og sé þekktur að því að hafa óbeit á drykkjuskap.

7. gr.

Reikningsár sjóðsins er almanaksárið. Reikningur sjóðsins skal gerður árlega og endurskoðaður á sama hátt og sveitarsjóðsreikningarnir.

8. gr.

Leita skal konungsstaðfestingar á skipulagsskrá þessari.

Hvammstanga, 22. febrúar 1936.

F. h. hreppsnefndar Kirkjuhvammshrepps.

*Björn P. Blöndal*  
(p. t. oddviti).